




受祐堂集目錄

析城張泰交洎谷



卷之七

撫浙 上

請補本標千把員額咨文

賀氏等照例斷銀免拆咨文

覆陳之桐未便拘審波累咨文

覆遵例停訟錢債未便拘審咨文

覆營馬倒斃不便拖累無辜咨文

斷賀氏等給主銀兩并查得祿契檔咨文

請飭出獵船隻不得多索滋擾咨文

移改圍獵處所咨文

覆朱裕生等提解拖累咨文

永禁海島搭蓋蓬廠咨文

覆鹽案罪贖應邀援免咨文

移飭汛弁協力勦捕咨文

禁止遠迎牌

永禁海島搭廠牌

禁命案株連抄搶牌

飭禁卒凌虐獄囚牌

禁法外虐囚牌

禁鹽捕借巡索擾牌

禁積蠹白役牌

禁徵解南糧陋弊牌

飭端蒙養牌

飭濫禁牌

飭省刑牌

飭恤獄牌

飭拖累牌

省刑清獄牌

清理監獄牌

飭審過人犯勿滯司監牌

再飭軫恤獄囚牌

飭毀夾棍鉗頭牌

飭臬司關防衙役牌

飭省倉重價折乾牌

嚴飭重價折乾牌

飭漕糧盜賣折乾牌

飭漕糧折乾攪和牌

禁錢米火耗折徵牌

禁徵南米濫用夫役牌

飭查收糧方斗牌

飭弛米禁牌

飭練精壯兵丁牌

飭海弁剿賊牌

飭守口將弁協捕盜賊牌

飭水師兵缺混補陸汛牌

飭巡防牌

禁關蠹盤踞牌

申飭計典陋習牌
飭知府勒索兵餉牌
飭拿訟師土豪牌
飭立三催限期牌
飭換票照牌
飭各屬月銷供應牌
飭行料理南巡事宜牌
飭平湖縣件作牌
飭拿撞棍牌
飭歲暮巡拿棍徒牌
飭屬吏恭懸諭旨牌
催南巡供應冊牌
估修三郎廟一帶塘工牌

受祜堂集卷之七

無浙上

析城張泰交洎谷

請補本標千把員額

咨兵部

為請 旨事康熙四十二年五月二十九日准貴部咨
開職方清吏司案呈奉本部送兵科抄出該本部覆浙
江巡撫張泰交題前事內開該臣等議得浙江巡撫張
泰交疏稱本年二月十七日蒙 上諭有云爾本標兵
亦要留心兵可百年不用不可一日不備當時加訓練
倘或地方有警爾有封疆之責可說書生不會用兵欽

此查臣標兵額設一千五百名現在標兵止有八百零六名浙省環山控海五方雜處匪類易生火警時有察奸撲火實惟臣標兵丁是賴請將現存兵丁八百零六名懇恩免裁等因具題前來查浙江撫標經制兵一千五百名康熙三十四年爲欽奉 上諭事案內裁去兵一百名又陸續裁去兵五百九十四名現存標兵八百零六名今該撫旣稱浙省環山控海五方雜處匪類易生火警時有察奸撲火實惟臣標兵丁是賴等語應如該撫所題將撫標現存兵丁免裁可也等因康熙四十

二年四月二十五日題本月二十七日奉 旨依議欽此欽遵抄部送司案呈到部移咨到部院准此隨即轉行欽遵外爲照撫標兵丁前經奉文裁撥所有右營年滿千總一員已咨貴部裁汰未補續有左營把總一員病故右營千總一員年滿俱未扳補今本部院將現在標兵題請存留荷蒙貴部允議免裁奉 旨依議咨行欽遵在案惟是千把二弁有稽兵束伍之任臂指差遣之責標兵旣奉存留理應照舊補額以合營制爲此合咨貴部煩請迅賜允示以便考驗扳補施行

賀氏等照例斷銀免拆

咨刑部

爲旗兵打詐等事據署浙江按察司事運鹽使司呈稱
康熙四十一年十二月二十日前司奉護理浙江巡撫
印務布政使郎案驗准刑部咨開浙江清吏司案呈奉
本部送刑科抄出浙撫趙題前事康熙四十一年八月
初六日題九月初四日奉 旨該部核擬具奏欽此該
本部看得先據浙江巡撫趙疏稱莊元信與徐世美旗
民互訐一案臣部行令該將軍等與巡撫會同確審定
擬具題去後今據該撫趙會同將軍丹等疏稱莊元信

之父莊成名原係徐世美之父徐德雲出兵舟山擄來之僕于康熙二十年間莊成名給徐德雲銀兩將伊身并伊家配給之妻及子女等贖出爲民後徐世美屢行恐嚇莊元信以伊身係世美家贖身之人因其嚇取無不勉應前後給銀三百五十兩徐世美將得價允贖之人屢屢恐嚇應照不應重律擬罪莊元信之舅祖母沈氏凌辱世美又毀掛帽元信並不勸阻亦照不應重律其莊元信係擄僕所生之子應否以贖身年久仍歸民籍之處聽候部奪等因具題前來查定例內旗下舊奴

僕之內年老有病之人各本主情願准贖者應回明該都統等咨文內開察情由用印咨送戶部准其贖出爲民若將可用年壯舊人借此准贖者亦照買賣例治罪等語莊元信並非年老有病之人係擄僕所生之子不便放出爲民將莊元信仍斷給伊主徐世美該撫旣稱莊元信之舅祖母沈氏毀壞徐世美掛帽元信不行勸阻合依不應重律杖八十應將莊元信鞭八十徐世美將不應放出之僕私自放出爲民并將放出元信爲民之官員俱應查議但此案事在屢赦以前應免其議罪

其贖身銀兩交與佐領向徐世美追出入官可也等因
康熙四十一年十一月二十三日題二十五日奉
旨知道了欽此相應移咨前去欽遵查照施行等因咨
院行司奉經備行理事同知遵照轉飭仁和縣將莊元
信之母沈氏張氏妻蔣氏子阿丙女阿二及莊元信俱
經詳解將軍給主在案續奉准將軍咨據徐世美稱莊
元信尚有伊嫂賀氏侄四德姪女阿能妹七孩子不便
久稽在外請檄該衙門速行起解等因行司查解遵經
前司備行理事廳去後隨據詳稱查看得賀氏係莊成

名贖身爲民之後自娶之媳並非當日贖身有名之人
而賀氏又孀寡多年應聽自便其女阿能係上年十月
內婚配李夢庚爲妻若比照家僕女兒不問伊主偷嫁
與人五年內控告者將所嫁之女斷回之例應將阿能
拆離給主但阿能係莊成名贖身之後娶媳所生之女
比照不問伊主偷嫁與人之例有間况又係閨女適人
理應從一而終應酌斷財禮銀六十兩給主免其離拆
其七孩子婚配趙楷已經十有三載應照家僕女兒偷
嫁與人已過五年之例免其拆離斷銀四十兩給主其

偷嫁之人例應鞭責係在康熙四十二年三月十八日
恩赦以前應予免罪至四德係莊成名親孫未便爲民
應請解給旗主等情前來查賀氏旣係伊翁莊成名贖
身之後聘娶之媳今又夫死守志孀居多年應如該廳
所議以全婦節仍着賀氏母族量出銀二十兩給主其
七孩子婚配有年阿能閨女配偶情有可原亦如該廳
所議各追銀給主免其夫婦離拆惟四德係莊成名嫡
孫不便斷出爲民應請咨解歸旗統候察核咨覆將軍
等因奉批仰候咨覆將軍繳奉卽轉行理事廳知照去

後又奉本部院牌准署將軍印務副都統阿咨行速解
歸旗緣由行司確議詳奪隨經行據理事多同知詳稱
覆查看得莊元信之嫂賀氏併子女等前奉查議職就
事比例業經詳明本司轉詳隨蒙據文移咨在案今准
署將軍回咨開據徐世美供稱不願受價只求斷人呈
請咨行地方官速解歸旗等語但查賀氏實係莊端尹
贖身爲民後所娶之婦孀居苦志守節七孩子適人已
十三載徑行解歸旗主情殊可憫其阿能閨女結褵自
應從一原情免其拆離斷銀給主實屬妥協今據來咨

既稱賀氏等速解歸旗應否轉請咨部示奪等情到司
該署按察司事運使高熊徵看得莊元信之嫂賀氏等
前經議請斷銀給領免其歸旗業奉咨覆將軍在案復
因旗主徐世美不願受價求斷給人致奉准將軍咨覆
行司確議遵行理事廳議詳去後茲據詳稱賀氏實係
爲民之後所娶之婦七孩子適人已十三載徑解歸旗
情殊可憫其阿能係閨女結褵自應從一原情應免折
離今應不歸旗之處轉請咨部示奪等情前來查賀氏
既係莊成名放出爲民之後自娶之媳並非當日原贖

有名之人自與旗婦有間其七孩子婚配趙楷已歷十
有三載例應聽其完聚至阿能莊成名贖身之後娶媳
所生之女出嫁與民人李夢庚已經成婚理應從一而
終是以前議分別酌斷財禮銀兩給與旗主其賀氏孀
居苦守伊母漏氏哀籲懇求免解歸旗按例原情俱屬
允當今若因徐世美不願收價遽斷歸旗揆之情理殊
覺可憫似應矜全各婦名節俯照前議斷銀給領免拆
歸旗實屬妥便擬合詳候咨請部示遵行等因到部院
據此再行會商去後茲准署將軍阿移覆七孩子照例

准其免解歸旗而賀氏等速行解交歸旗等因到部院
爲照莊元信與世美互訐一案准貴部議覆莊元信係
擄僕所生之子不便放出爲民等因隨將元信及母妻
子女移解將軍給主訖查元信奉 旨歸旗主緣徐德
雲未經咨明戶部准贖且因元信非年老有病之人是
以斷給世美竝未議及元信故兄贖身後外娶所生之
子女也查督捕例內開一凡逃人外娶之妻所生之女
有聘嫁與民人者不便拆散不斷與逃人之主仍歸給
伊夫等語夫逃人在外嫁出之女尚不斷給本主則今

阿能係莊成名贖身之後娶媳所生之女閨女適人理
應從一而終斷給財禮銀六十兩給主免拆可爲情例
均協而賀氏亦係莊成名贖身之後所娶之媳查現行
則例內開一另戶平等人用財禮聘娶之婦及用財禮
所娶家僕之女夫亡之後願守節者聽欲改嫁者其母
家給還原聘財禮將婦准其領回等語今賀氏情愿寡
居苦志守節而賀氏之母又具呈哀籲免解歸旗情愿
斷銀以全名節而徐世美堅執要人本部院屢咨未結
事屬兩難不得不煩請貴部裁示相應咨達爲此合咨

貴部察照賜覆施行

覆陳之桐未便拘審波累

咨鎮浙將軍

為遵奉

恩詔事准貴

將軍副都統

咨開旗兵呂宮元控告

中保陳聖音等負債一案希乞轉行帶赴會審緣由到

部院准此為查朱偉仲所借之債事歷一十四年今稱

物故即果所欠是真亦應向偉仲之子自行清理在陳

之桐並非借債之人且據呈稱捏造為中何得擅領婦

女至彼打鬧雖 恩詔內無赦免債負一款而舍負債

之人反波及于莫須有之中人若復拘犯會審恐滋株

累且濫受詞狀貽累善良現奉 恩詔列款嚴禁似未

便再行拘提也照准前因合就咨覆煩請查照施行

覆遵例停訟錢債未便拘審

咨鎮浙將軍

為遵奉

恩詔事准貴

將軍副都統

咨開旗兵呂宮元呈控

陳聖音等負欠一案仍飭理事同知帶赴公衙門會審緣由到本部院准此為照定例內開每年自四月初一日至七月三十日時正農忙除謀反叛逆盜賊人命及貪贓壞法等重情照舊審理其一應戶婚田土以及鬪毆等細事一槩不准受理今呂宮元既控係錢債事情未便於停訟時違例拘審照准前因合再咨覆

覆營馬倒斃不便拖累無辜

咨鎮浙將軍

為戳死營馬事准貴

將軍副都統

咨開旗兵說色之馬據供

當日會同蕭邑劉典史驗看蹄踪血跡俱在陳孚先菜地明係戳死是實今稱倒斃後被戳以致旗兵不甘屢呈具籲應請嚴飭該縣將當日會驗典史及地主人等拘提會審緣由到部院准此為查旗兵說色之馬牧於蕭邑地方倒斃前經該縣委令典史眼同旗兵驗看之時皮肉不番又無血跡明係倒斃無疑矣乃旗兵因馬死後故為裝點傷痕其如生前死後之傷各有分別難

以陷害無辜也設或戮死果真亦應案緝真犯究追豈
可以馬斃于陳地卽向陳姓之人究償乎假使此地別
有身屍在焉亦可以執地主究償抵命乎况說色之馬
經該縣再三查勘又據理事同知二次詳咨銷案若地
主陳孚先如有應得之罪法之所在本部院理應行提
會審但無辜者不便提審拖累照准前因合再咨覆貴

將軍
副都統
煩請查照施行

斷賀氏等給主銀兩并查得祿契檔

爲旗兵打詐等事爲查賀氏阿能等復准大咨仍飭照
文斷人解旗交主等因隨行臬司再加確議詳奪去後
茲據詳稱阿能係贖身後所生之女旣已成婚不便拆
離仍照前議斷銀給主其賀氏旣經母家領回守節例
應給還原聘財禮前量斷銀二十兩諒屬不敷今議再
加銀二十兩共成四十兩以聽世美另購別婦代供執
役至于得祿查世美在旗清字原呈放贖人口六名之
內並未載有得祿其人今兩造所供賣身年分懸殊未

便懸斷請咨訊明前來查賀氏阿能揆情按例而斷俱屬允協今又復據議斷合再移咨爲此合咨貴將軍副都統煩請查照希將賀氏阿能轉飭照斷結案仍訊明世美將得祿係是何年所買中保是何姓名有無印契上檔情由示覆以便飭提質審定奪施行

請飭出獵船隻不得多索滋擾

咨鎮浙將軍

爲兵丁習練等事准貴

將軍副都統

咨開本將軍宗室會同

副都統阿陳定于十月十八日親率官兵在于湖屬之武

康德清等處一帶圍獵至于僱用划子便民等船計一百八十餘隻希卽轉行該衙門照例預備仍祈循例飭示緣由到部院准此除現在給示經過地方仍令該府縣遍行曉諭并行仁和縣遵照外爲照所用船隻咨撥既有定數自應照數雇備惟是奸準藉以漁利將民船一概封捉不啻幾倍大爲民害上年本部院聞民怨沸

騰曾經拿究據稱兵丁分外多索兼且折銀私放惟恐
悞公不得不多為預備等語隨行枷責發落故又咨明

貴將軍副都統一體嚴禁在案今准大咨前因已照例飭備

并令驛道親加巡察不許多索折銀亦不許奸卑滋擾

外茲當貴將軍副都統紀律嚴明之際兵丁自凜遵鈐束但

弊之所在不厭詳慎合再咨請申飭為此合咨貴將軍副都統

煩請遴委幹員嚴查兵丁於撥定船數之外不得多索

一船以致奸卑藉口滋擾庶弊端可杜而商民頌樂足

仍舟誼不淺矣仍希示覆施行

移改圍獵處所 咨鎮浙將軍

為兵丁習練等事准貴將軍副都統咨開副都統胡高定于十

一月初三日親率官兵在于杭屬之富陽嚴屬之桐廬

等處一帶圍獵希即轉行該衙門照例預備江船仍祈

循例飭示緣由到部院准此案查歷年圍獵來咨俱係

赴下河湖屬等處從未有至上江嚴屬地方一帶圍獵

之案今准大咨似屬創行雖鈐束森嚴民間自無擾害

第富陽桐廬等處從未圍獵之地一旦官兵驟至居民

不無畏懼且上江船隻無多非下河等埠可比本部院

再四籌維莫若仍循舊例爲便照准前因相應咨明爲
此合咨貴將軍煩請察照所將打圍處所仍照往例
酌行移示以便轉飭遵照施行

覆朱裕生等提解拖累

咨銜浙將軍

爲虎棍朋劫客貨等事准貴

將軍副都統

咨開旗丁趙明亮

呈控朱裕生等朋劫血本一案煩請轉行提解會審緣
由到部院准此爲查趙明亮以朱裕生等竹價未清列
單控追雖係旗民互訐第屬行帳細事據稱呈縣行追
有案應聽該縣就近追給且單內開列多人未便提解
會審致滋拖累照准前因合就咨覆

永禁海島搭蓋蓬廠

咨督院溫鎮

爲查議事准溫州鎮咨覆溫屬海山漁廠已會委文武
概行燬逐此時已無存在應否俟巡歷之後寧靖之時
酌議稽查之法或撥兵防守緣由到部院准此爲照玉
環等山孤懸海中原無人民棲息因聞有外省流民與
本地窮民樵採捕魚搭篷居住者恐其間奸良莫辨所
以查議禁逐以靖盜源蓋爲疆圉防禦之計非專爲一
時起見也前准大移焚其居驅其人已得肅清之法惟
恐相沿日久人口滋多一時驟逐殊無所歸故又令道

員往視相機度勢可行則行今根株已盡則隱憂既去
在地方官不煩他慮自當永杜故轍未可復開棲址之
漸又費日後經營所云俟巡歷後酌議之處毋容置論
除行溫處道遵照永禁并覆溫鎮外相應咨覆

覆鹽案罪贖應邀援免

咨鹽院

爲移明事准貴院移明各屬具詳援免罪贖銀兩希乞
批令起解庶于題報無悞緣由到院准此案查李伯凡
平三兩案未完罪贖部覆仍令追完彙解者因事在
赦前審結贖銀業經報部具題之項是以 赦後不予
援免非凡屬鹽案罪贖槩令遇 赦不援仍行追解也
今恭逢 詔欵死罪減等軍流等犯咸赦除之則鹽案
犯徒情罪例得邀 恩援免其折贖銀兩旣未荷題報
亦應邀援豁免照准前因合就移覆

移飭汛弁協力勦捕

咨浙江提鎮

爲嚴飭守口將弁協力搜捕盜賊以靖海疆事爲照海
洋奸艘頻肆劫掠該汛將弁自當加意巡防無分疆界
協力搜勦以衛邊圉而安商艘庶不致虛糜俸餉有忝
職守今半月之內連劫多舟奪貨掠人頻聞無忌沿海
汛弁職司巡防奚堪懈怠偷安以致往來商艘慘遭劫
掠貽患海疆除嚴飭沿海各協營並檄道員設法勦捕
外合就移咨爲此合咨貴提督煩爲查照希卽會飭沿
海汛弁協力搜勦并祈酌裁設法籌畫撲捕俾海晏商

安足何舟誼非淺仍祈示覆施行

移商扼要協勦

咨督提及定溫二鎮

爲移商扼要協勦機宜以靖海疆事爲照今歲海洋商艘肆劫頻聞雖經嚴飭會勦迄未獲報今本部院訪聞大洋之中有九山向爲賊船艤泊之所其間島嶼竦峙南北往來必經此處又寧郡之半邊山其外渺茫無際卽係大洋若有賊舟亦往往於此暫泊再溫郡之鳳凰山均係海賊經由停泊之地蓋近洋卽有口次設有官兵賊舟難以戢使不敢闖入惟此三處實係要地可以揚帆橫行且賊每乘南風而來俟北風而去皆係必經

處所扼要協擒不可無策若於此三處酌撥舟師常川
輪流巡守以防奔逸勿得舍舟歸營不惟可以彈壓地
方且可習諳水汛本部院訪聞如是未識於洋面機宜
誠有當否合就咨商煩爲查照如本部院所訪不謬祈
卽迅飭該汛弁兵常川巡守遵照協擒并賜移覆施行

禁止遠迎

爲禁止遠迎以肅官箴事照得往來迎送久經嚴禁今
本部院欽承 簡命撫蒞茲土期與闔屬文武大小官
員共圖實政不事虛文出境遠迎不特曠疎職守抑且
騷擾郵傳合行飭禁爲此牌仰該司查照來文事理卽
便通行闔屬文武各官遵照憲綱務宜勤修職業保固
地方不得遠來迎候致干 功令并移行各司道一體
遵照毋違

永禁海島搭厰

爲查議事准温州總鎮李咨開前事等因到部院准此
爲照玉環等山孤懸海中原無人民棲息因聞有外省
流民與本地窮民樵採捕魚搭蓬居住者恐其間奸良
莫辨所以查議禁逐以靖盜源蓋爲疆圉防禦之計非
專爲一時起見也前准溫鎮咨會焚其居驅其人已得
肅清之法惟恐相沿日久人口滋多一時驟逐殊無所
歸故又移令差員往視相機度勢可行則行今根株已
盡則隱憂旣去在地方之官不煩他慮自當永杜故轍

未可復開棲址之漸又費日後經營所云俟巡歷後酌
議之處毋容置論除咨覆外合行飭禁爲此牌仰該道
官吏查照來文粘抄事理卽便遵照轉飭永禁毋違

禁命案株連抄搶

爲通飭嚴禁命案株連抄搶安民生以遏刁風事照得
殺人者抵律有明條藉命牽告亦干例禁本部院撫綏
茲土訪聞浙俗是稱刁險誣賴成風凡遇命案恃爲苦
主藉命居奇未經告官先行抄搶甚至兇手之家父兄
親屬子弟無不任意牽告一網打盡惡習相沿牢不可
破且經訟師刁筆竟將絕不相干或因有平日微嫌或
利其家資殷實輒指爲元謀喝令加功共毆恣意株連
任情羅織在有司之賢良者不難推情問事民自無冤

一遇糊塗問官不察是非來歷止覘苦主原呈竟不細
詢真確輒爾簽差肆出鎖拿拘審受誣之人即使辯白
昭雪而其間廢業妨工之累守候拖累之苦再加胥役
之勒索而不爲傾家蕩產者幾希矣揆厥所由皆地方
官因人命關係重大矜憐苦主過爲姑息置之不究或
慮上控或慮妄供但初供之時何難槩爲解審應釋與
否聽上司發落以免他日駁詰登答之煩乃至牽連道
斃者有之濫禁患病殞命者有之此固苦主牽告所致
亦地方官聽斷無術縱之使然也合行嚴飭爲此牌仰
該司府官吏查照來文事理卽便轉飭所屬嗣後凡承
審命案除真正兇手元謀助毆確証妥犯照常招解外
其餘一應枉陷干連人等審明卽行省釋如苦主誣告
情真抄搶有據亦當律究不得姑息以長刁風此本部
院軫念小民無辜拖累是以諄切告誡務期積習除而
民業安慎勿視爲具文亦不得借此爲題縱令經胥賄
放要犯致于提究未便

飭禁卒凌虐獄囚

爲通飭禁卒凌虐獄囚以肅法紀事照得牢獄原爲羈
禁罪囚而設但事有重輕必待審明定案罪當者自有
應得之罪豈容詐害凌虐今本部院親審一件檢典夫
命事餘姚縣姚方致死姚成壽一案據姚方稟稱每夜
禁卒要伊敲梆巡更手被鎖鑰不能重擊而禁卒又以
輕擊爲由恣肆毆詈本部院聽聞之下不勝痛恨一縣
如此他縣可知此皆有獄各官平時漫無覺察故爾禁
子獄卒敢于作惡犯人有錢使用者雖重罪必多方寬

容而窮苦無錢者雖罪輕亦百般嚇詐稍不遂欲絕其衣食受辱難堪致使囹圄人犯飲恨莫伸報病報故殆無虛日殊屬非法合亟通行嚴禁爲此牌仰該司官吏照牌事理卽便轉行所屬嚴加申飭嗣後一切重犯用心看守毋任禁卒人等令犯擊柝巡更以及橫加凌虐該印官仍不時稽察敢有故違不遵在監勒索詐害者立時拿究如該管官膜視怠玩或經本部院另案審出或被訪聞定將本官立刻飛叅禁子獄卒卽拿處死決不姑貸

禁法外虐囚

爲嚴禁法外加刑凌虐重囚事照得刑法之施原非得已法外加法實屬殘忍本部院訪聞浙省陋弊凡監禁重犯或隔一月二月必重責數十板名曰打肥夫盜犯命犯或斬或絞已有應得之罪若此罪外之罪又出何律設謂恐其疎虞則嚴行鎖鑰加謹防守何必節次加刑自蹈酷虐合行嚴飭爲此牌仰該司官吏照牌事理卽便轉飭各屬嗣後凡監禁盜犯命犯止須嚴行鎖鑰加謹防守毋得仍行打肥如敢故違本部院卽以凌虐

罪囚題叅決不寬貰

禁鹽捕借巡索擾

爲嚴飭鹽捕借巡搜勒商船以肅法紀事照得長江一帶上通閩廣傍達徽寧江右來往商艤如織本部院屢經密訪該縣鹽捕人等假以緝私爲名無論商舟漁艇恣意搜索卽空身行人亦必索錢數十文然後放行果獲私鹽又復得錢賣放竟不報官以致商民飲泣私販充斥該縣身任地方漫無覺察不識所司何事溺職已極本應分別叅究姑先嚴飭爲此牌仰該縣官吏查照來文事理卽便嚴飭鹽捕人等嗣後務宜洗滌肺腸奉

公守法敢再借端索詐來往商民船隻者立拿杖斃該
管印官以失察叅處決不寬恕仍具遵依報查毋違

禁積蠹白役

爲嚴禁積蠹盤踞白役朋充以肅法紀以除民害事照
得衙門吏書各役俱有定制縱蠹養奸卽干嚴例額外
私設亦有處分煌煌 功令孰敢不遵近聞各屬多有
不遵經制濫用白役更有屢犯斥革之徒更名復入資
緣盤踞若不剔除何以肅清吏治爲此牌仰該司官吏
照牌事理卽將該衙門并移行撫屬各衙門一應吏書
以及門皂頭役逐一清查不得容留積蠹濫用白役仍
造花名清冊送查毋得陽奉陰違察出致干嚴究未便

禁徵解南糧陋弊

爲詳明開徵等事爲查杭嘉湖紹金衢六府屬南米業據該司詳請通飭開徵在案但各屬收糧弊竇不一小民有米完納指勒不收使其風雨守候倉前及至解收指稱盤剝折耗解費陋規浮斛淋尖額外橫索又有矜棍積歇包攬折乾上庄代納至于嘉湖之米解省過壩有等壩夫船戶串通胥役分認縣分坐名裝載每石抽扣船脚價費一二升不等分肥飽橐似此層層剝削無非吮吸民膏今開徵伊始若不禁飭弊貽無窮爲此牌

仰該司官吏照牌事理即便嚴飭各該府屬邑徵收糧米照所頒部斛平量攜收解給兵食并補還漕捐米欸不得假手蠹役指勒索額外橫徵耗贈折乾烹肥如有衿歇把持包攬嚴拿重究其各縣解省南米到壩聽從雇船運載上倉毋許蠹棍串通分認坐裝夫船腳價不得反浮客貨倘有踵習陋例藐玩不遵官則指叅蠹棍立拿究處斷不姑貫文到取具遵依甘結送查毋違

飭端蒙養

爲申飭蒙養宜端以正人心以厚風俗事照得牧民之道化俗爲先教養之方童蒙伊始故黨有庠術有序而城鄉市集之間設立義學延塾師以訓迪之朔望宣講鄉約以提撕之皆 聖天子所以維風勵俗愛育生民也蓋人性相近溺於習染旣深之後則難爲力導于良知未昧之先則易爲功彼童蒙者天性初賦血氣未定教養有方心術必正若養而不教或教而不得其道將見智者流于澆薄愚者畝然罔悟甚至不肖之徒小則

放僻邪侈大則逆禮犯分無所不爲詎爲父師者一味
任情姑息愛而勿勞而牧民之官絕不思所以化導之
術 聖訓不加深繹義學視爲虛設無惑乎世日澆而
人心不古也合行通飭爲此牌仰該府官吏文到卽便
轉飭各屬縣無論城市僻壤軍民人等有幼年子弟從
師肄業務于句讀字識而外勤講 上諭多方訓誨申
之以孝悌忠信約之以禮義廉耻俾童蒙志向有定薰
陶得效一面清查境內義學共有若干所力行捐俸延
儒興舉以副 聖朝作人盛典本部院以教化之疎密
民風之厚薄覘吏治之勤怠其或以迂而不務務而寡
效虛應故事卽大負父母斯民之意矣責有攸歸其各
恪遵文到先具遵依報查毋違

飭濫禁

爲嚴飭濫行監禁事照得囹圄之設雖以拘繫罪人原
應酌量情罪輕重庶無冤濫今察所屬往往將不應羈
禁之人濫行收監或爭訟微嫌或欠糧細故或仇攀誣
指或粘帶牽連不問情之虛實不論罪之大小槩先收
禁不惟平人一入犴狴拋家失業而獄卒牢頭因之需
索凌虐以致疾病死亡不一而足深可痛恨查定例開
載一應重犯仍行監固外其餘情罪輕小事件在外散
審又云凡情罪重大要犯務宜牢固監禁詳審確擬如

案內牽連犯人有情罪稍輕者准取的保等語令甲煌煌豈容違悖合行嚴飭爲此牌仰該司府官吏照牌事理卽便轉飭所屬除真正命盜重罪等犯須牢固監禁外其餘情罪稍輕者照例取具的保至輕小事件止許在外散審不得槩行濫禁如敢故違及任胥朦混希圖藉端詐害者定行據實叅處該司職任祥刑須留心體察慎毋泛視干咎仍先取具遵依報查凜之速速

飭省刑

爲通飭省刑以重民命事照得用刑原貴欽恤作吏首禁逞殘况當盛暑筋力脆弱皮肉易腐尤當加意軫念順時節宣所屬有司存心慈愛者固知民命爲重于杖責之中寓哀矜之意而暴戾成性者藉口熟審已停肆志作威恐亦不乏殊不知 上諭停止熟審原以重犯希圖減等延捱滋弊起見而慎刑定例煌煌星日豈可自蹈酷虐致傷好生之德合行申飭爲此牌仰該司道府官吏查照來文事理際此炎月凡自理應決罪犯各

照所犯輕重量加懲劓如擅用違式大板及濫行多責致傷民命者一經察出定行叅究卽轉飭所屬一體遵照毋得故違

飭恤獄

爲申飭矜恤獄囚以重民命事照得時值隆冬各屬監犯多有身無完衣夜無卧具者凍餒疾病殊堪憫惻雖陷罪乃自作之孽然哀矜實民上之心合亟申飭爲此牌仰該司官吏照牌事理卽速通飭所屬有獄各官逐一清查監內除杖笞輕罪及干連無辜之人無得濫禁外其應禁各犯如無棉衣者該印官捐給棉衣并給草薦薑湯飲食務須以時給發毋致凍餓有病撥醫調治勿使瘦斃仍將給過名數造冊呈報以憑察核倘有獄

各官慢不經心虛應塞責察出從重叅處不貸

飭拖累

爲嚴飭牽累無辜事照得聽斷惟期得情而訟獄首嚴株累如正犯孽由已作伏法受誅固所自取但如一案之中有本無干涉原告含恨羅織者有並非証據牽連候訊者一人緣事禍及親隣以及經年拖累千里馳逐小則廢時失業大則敗產傾家含冤吞聲莫可控愬查定例內開如重犯案內或挾仇攀害或無辜牽連者應不候本犯罪名結案卽行釋放又准部文通飭一應案內干連之人州縣官確審果係無辜牽連者止錄原供

受刑堂集
申詳不必起解卽行釋放等語乃查所屬解到案件竟將無辜之人槩行起解殊屬違例合行嚴飭爲此牌仰該司府官吏照牌事理卽便轉飭各屬嗣後一切事案之內有並非要証及牽連指告訊係無辜者立卽釋放止于原案敘供詳明不必起解致滋拖累至于自理事件亦須恪遵定例如婦女非犯姦盜人命令伊子姪兄弟替審毋得妄拿到官又如自盡命案別無他故者不必拘訊兩隣又強竊盜失主止許到官聽審一次認贓一次卽令寧家不許往返拖累俱宜一一奉行如敢故違及縱役朦蔽藉端擾害定行察叅該司府亦不得任胥苛駁致滋累民并干未便慎之慎之仍先具遵依報查速速

省刑清獄

爲省刑清獄以挽天心事切照天道亢暘愆期不雨本部院念切民瘼虔誠步禱未霈甘霖日夜焦思或刑獄不清以致天心未順自奉 恩詔之後所有援赦人犯已據各衙門造冊具詳分別省釋在案矣惟未結之案或有輕罪人犯未經省宥或各衙門自理事件不分輕重一槩濫禁濫枷致干天和亦未可定合亟飭行爲此牌仰該司官吏照牌事理立即轉飭各屬迅將未結輕罪人犯及自理事件濫禁濫枷者槩行保釋至現禁重

囚亦必多方軫恤掃除監舖洗滌刑具以去穢惡務各一體遵行以冀共迓天庥毋得視爲具文致干察究未便

清理監獄

爲清理監獄以重人命事照得牢獄之設所以拘禁罪犯有問刑之責者果能勤敏聽斷自然案無留牘之虞獄鮮久淹之犯也茲本部院披閱該司詳案內報病報故之文竟無虛日此皆有獄各官平日漫不留心清理加以天時之不齊禁卒之凌虐及至患病雖據報稱撥醫調治問其實不過虛應故事而已致使情真罪當者不能明正典刑而犯無死法者輒令骸填獄底深可痛恨合亟嚴飭清理爲此牌仰該司官吏文到立速親詣

司監并省會各衙門監舖弔監簿查點如有輕罪應保候人犯立取的保候質內有重犯感患時疾者飭令司獄各官務選良醫調治勿使痠斃并嚴飭禁卒毋許凌虐倘有怠忽玩違致犯淹斃者經本部院親臨監舖查驗得情獄官叅拿禁卒杖斃決不寬饒

飭審過人犯勿滯司監

爲飭知事照得該司解院候審人犯如已經本部院親審發回自應立時發縣查明罪之重輕分別收禁看守保釋以省守候拖累之苦再查該司初十文內監犯患病八人病故三人本部院披閱之下不勝惻然值此皇恩大赦之後淹致病死是誰之過歟合併嚴飭爲此牌仰該司官吏查照來文事理嗣後一應解審人犯已經本部院審過者立速轉發該縣不得羈候司監內除死罪軍流人犯照常飭縣收禁外其徒犯倉羈杖犯取

保至于無辜人等該司立即釋放再各屬解司人犯該
司自當速爲審轉慎勿濫禁久羈以致累斃併干嚴例
未便

再飭軫恤獄囚

爲再嚴軫恤獄囚以重民命事照得小民無知犯法身
繫囹圄情狀最苦而嚴寒盛暑其苦尤甚茲本部院披
閱文案監犯報病報故接踵而至且有甫經報病旋即
報故者此皆有獄各官平日不知軫恤而禁卒人等需
索凌虐又不能覺察禁止以致染成疾病兼之獄舍不
行打掃蒸爲疫癘雖撥醫調治徒有其名嗟此桎梏之
人能不化爲獄燐乎今時當盛夏正濕熱霧蒸之候合
再嚴飭爲此牌仰該司官吏照牌事理即便轉飭有獄

各官督令禁卒將監倉每日打掃潔淨多燒蒼木白芷等物以辟穢氣其飯食務要新煮不得將臭惡者與食如有人犯患病卽撥有名良醫調治并須不時親赴監內省視本部院諄切告誡不啻再四慎勿目爲泛談置之高閣一經本部院親臨監倉察出官叅役處悔無及矣

飭毀夾棍鉗頭

爲飭禁夾棍鉗頭以全民命事照得刑罰之設所以弼教原非得已惟貴所司于用法之中寓哀矜之意乃訪聞紹屬于夾棍之外又有鉗頭之制積習相仍視爲固然以致一罹于法非慘斃俄頃卽殘廢終身堪爲酸鼻殊不思夾棍已在五刑之外故丁寧告戒不許輕用定例炳如日星豈容又加鉗頭殘民以逞乎合亟飭禁爲此牌仰該司府縣官吏凜遵定例凡命盜等案重情或須夾訊止用繩收不許分外擅用鉗頭自蹈酷虐之咎

文到速卽毀滅如敢藏匿抗違一經訪聞發覺定行指
叅先具遵依報查速速

飭臬司關防衙役

爲嚴行申飭事照得臬司衙門爲刑名總滙所有書役
自應嚴加封鎖留心稽察以杜弊端本部院訪得該司
書役關防不密作弊招搖自前司患病以來不能理事
此輩之舞文作奸日甚一日本部院業將前司題叅本
應按名嚴拿重處姑念前司已故未免扳累堪憐從寬
免究該司清操素著是以具題署理知必冰蘖自矢不
負委任但此輩幸免于禍以爲得計且相習成風肺腸
如故稍有不慎咎將誰歸合行嚴飭爲此牌仰該司官

吏照牌事理嗣後務須加謹關防勿使復蹈前轍如仍
敢招搖作弊怙終不悛本部院定行按名密拿立斃杖
下該司慎勿以署理之員因循疎縱未便

飭省倉重價折乾

爲嚴飭事照得各屬額解徵解原有定數加派重干嚴
例撥解省倉自應照額平收毋容分外勒索今訪聞管
倉官役凡米運解到倉故嫌米色不堪篩颺簸揚因而
捐收折乾橫索重價每石收至一兩五六錢不等司既
取于縣縣必剝于民層層剝深爲民累除現在密察
拿究外合行嚴飭爲此牌仰該司官吏照牌事理嗣後
各屬解米到省務須照額平斛攬收毋許抑勒重價折
乾烹肥收糧官役如敢仍前橫索額外多收定卽一併

嚴拿叅究決不姑貸該司仍將本部院檄飭緣由大書
告示實貼倉場曉諭各宜凜遵毋忽

嚴飭重價折乾

爲嚴飭重價折徵以除民累事照得浙省南秋軍儲等
米各府屬邑浮徵橫索私折烹肥本部院除經出示嚴
禁外但查杭紹台金等府屬富陽各縣案據該司詳稱
止產秬米解運艱難議令每石折徵銀一兩赴省買米
交倉卽天仙二縣撥解寧海營兵米亦徵銀八錢給兵
採買概不得多徵毫厘隨經前院批飭遵照在案此不
過欲使兵民兩便權宜改折屬員自應仰體恤民之舉
照價平收豈可借名允折之行恣肆橫徵今訪聞各縣

多以此項折色重加耗費勒令傾銷銀錢交納更有積
蠹包攬額外私派剝民膏而飽蠹腹莫甚于此合行嚴
禁爲此牌仰該司官吏即便轉飭各該府屬邑嗣後務
照詳定數目平收令民自封投納不必傾鎔成錠印官
赴省買米交倉毋許假手胥役額外多徵毫厘卽天仙
二縣徵給寧海營兵米折價亦須照時詳報酌減如有
仍前重徵橫索藐玩不遵該司訪察確實立卽揭叅收
役鎖拿解究斷不輕貰文到取具各屬不致多收依結
報查毋違

飭漕糧盜賣折乾

爲嚴禁盜糧折乾以重國儲事照得弁丁駕運漕糧顆
粒均係 天庾正供毋容盜賣折乾漕法森嚴近查有
等不法運丁往往于兌糧水次串通倉蠹勒講價值折
乾對會米不上船捏報虛數得銀入手恣意花銷或有
盜賣糧米換易貨物不肖運弁得受陋規通同隱諱以
致侵缺正糧甘受處分今兌漕伊邇誠恐弁丁利令智
昏復蹈前轍深爲漕害合行飭禁爲此牌仰該道官吏
文到卽便嚴飭各幫運弁今歲交兌漕糧務督頭伍各

丁親赴倉厥星飛眼同兌解照數裝載上船該運弁晝夜巡防該道不時嚴加盤察必期實兌實貯出境長行如有折乾盜賣卽行據實詳報以憑叅拿治罪仍將逐日兌過米數開明具報竝取弁丁頭伍綱舵人等互保各結送院核奪事關漕糧重大該道務必加意察查盡除錮弊以足國儲毋得徇隱致干未便

飭漕糧折乾攙和

爲再飭折乾攙和之弊以重兌運事照得漕白二糧上關天庾正供自應徵收本色好米交兌庶通倉無掛欠折耗之虞今查各屬官胥往往糧戶運米到倉不卽斛收刁指守候勒銀折乾高價重平得以分肥及至交兌之時乃購買碎襍之米攙和充數而領運弁丁復藉米色不堪勒加贈貼又或折價對兌私相授受以致無賴旗軍得銀到手任意花銷故每年抵通上納率多掛欠皆由折乾攙和所致深爲漕害今糧米正在徵兌之

際誠恐不肖官弁丁胥仍踵前弊合再嚴飭爲此牌仰
該道官吏文到即便轉飭各州縣衛所今歲漕白二糧
務遵定例徵收本色乾潔好米滿厥交兌該道不時嚴
察倘有捏報滿厥折乾對會以及私購惡米起運等弊
卽行指名揭報叅究慎毋徇縱扶隱致干竝譴未便

禁錢米火耗折徵

爲嚴禁錢糧火耗南米折徵之弊以甦民困事照得浙
省徵收錢糧與南米折徵耗羨本部院已經嚴禁在案
今訪聞紹興府屬徵收錢糧俱令花戶赴銀鋪秤封每
兩勒加耗羨八分方給封令本人赴櫃投納如封袋上
無銀鋪印記櫃書概不肯收是名爲自封投櫃而實則
銀鋪估計也其間零星碎戶肩挑度日者以錢完糧每
錢百文止作銀九分夫該府錢價每千紋銀一兩何至
完糧止作九錢總由櫃書鑲通銀鋪分羨作奸至南米

折徵業經前院題准奉 旨毋許折徵勒石永禁今紹
屬仍踵折徵銅弊南米經承俱積年慣蠹包充甚至花
戶完米不由縣署投收俱令赴經承家內完納每米一
石折銀一兩一二錢不等間有運米交納必勒索守候
及至上倉則淋尖踢斛每石勒加耗米一斗六七升不
等嗟嗟小民奚堪剝膚官役貪婪目無法紀本應叅拏
寃處姑再嚴飭爲此牌仰該司官吏文到立即轉行紹
興府嚴飭所屬痛改前非嗣後徵收錢糧俱令花戶自
封投櫃不得仍令銀鋪秤封勒加重耗至小民以錢完
糧估計錢價收納不得每錢百文止作九分徵收南米
毋許折乾糧戶運米上倉不得勒指加耗以及淋尖踢
斛等弊該司轉飭該府大書告示遍貼曉諭倘再怙終
不悛官叅役處決不寬假仍取遵依報查毋違

飭徵南米濫用夫役

爲詳明開徵等事爲查杭嘉湖紹金衢六府屬南米例于十月開徵已據藩司詳請通飭在案查各縣收糧濫用積蠹胥役需索弊竇不一如糧里運米到倉卽應隨時收納乃指勒耽延累民守候指稱盤剝折耗解額外橫索陋規取足方行收受而臨斛之時又高浮淋尖任意狼藉兼有衿棍積歇包攬折乾上庄代納搬駝筐斛等項夫役盤踞運收抑勒脚價似此層層剝削無非吮吸民膏今開徵在邇除嚴行察訪拿究外合先嚴飭

爲此牌仰該司官吏照牌事理卽便嚴飭各屬徵收南糧務照所頒部斛平量攬收不許濫用蠹役及積奸倉夫笆斛人等盤踞倉場捐勒需索浮斛淋尖額外橫收耗贈脚價陋規及縱衿棍把持包攬折乾代納至嘉湖各縣解省南米過壩剝運應聽從其便乃有壩夫船戶串通胥役分認縣分坐名裝載抽扣船脚價費上年業已嚴行飭禁今歲一體再行革除如敢踵習陋例藐玩不遵一經察出官聽指叅蠹棍立拿究處斷不姑貸文到飛行各屬將本部院此檄備由出示大書曉諭倉場及過壩處所取具遵依報查毋違

飭查收糧方斗

爲再行飭查事照得杭嘉湖三府屬漕白糧斛係前院
畫一製造當堂驗烙甫及一載諒無磨損本部院前經
檄令該道轉飭各府縣躬親察驗如無剗削寬鬆等弊
取具甘罪印結送院免其解驗在案第方斗俱係照斛
較准同時印烙自當一例察驗今據海寧縣詳請改製
圓斗除詳批不准行仰道嚴飭外但恐奸胥倉蠹乘機
舞弊或暗製圓斗大升或于方斗內四傍板底私行削
鏟寬大以及升不照斗斗不應斛大小參差多收病民

亦未可定合再飭查爲此牌仰該道官吏文到立即飛
飭杭嘉湖三府屬速將收糧方斗逐一躬親察驗倘有
私製圓斗大升鏟削寬鬆多收累民等弊立刻指名詳
報以憑叅拿究處如果無前弊亦卽取具府縣甘罪印
結送查事關徵漕重務不得扶隱徇縱致干未便

飭弛米禁

爲飭弛邊海之米禁以便商民事照得便民莫先交易
遏糴反滋弊端惟因上年海洋偶爾鼠賊飄突劫掠商
民船隻恐有沿海射利奸徒罔知法紀裹糧賫寇是以
准溫鎮咨禁曾經前院趙檄行沿海文武員弁并出示
溫屬飭禁在案此不過暫禁于海盜竊發之時原未永
禁今海洋澄清自當聽民隨便糴賣庶可以輸國課而
濟民食也合亟飭行爲此牌仰該司道官吏查照來文
事理卽便移行沿海文武官弁一體遵照并出示曉諭

民間或有積儲米穀任憑發糶毋得攔阻指勒敢有故違許商民人等喊稟所在官司具報查究毋違

飭練精壯兵丁

爲飭練精壯兵丁以資實用事照得馭兵之術在乎將得其人該管官弁平日講求訓練臨時庶有實用今查本標官兵士皆疲憊馬多羸弱虛糜糧餉殊干功令今兩營兵丁業奉 俞旨免裁豈容悠忽從事合行嚴飭爲此牌仰該中軍照牌事理即便督率弁兵日逐操練務期弓馬熟嫻一兵獲一兵之用毋得濫留老弱以及虛數冒支本部院親臨較閱查出該中軍大有未便至于本標所缺千把三員及有未盡事宜俱卽查明議

詳以覈核奪毋得遲違

飭海弁剿賊

爲嚴飭會剿事照得海洋地方遼濶界連閩廣皆賴鎮守將弁無事則碁布星羅寇莫敢犯有事則風馳電逐賊無所逃庶幾海宇澄清商民安業方不負朝廷建官設兵至意乃今入夏以來盜賊蜂起肆擄肆掠不可更僕數報刦報傷不啻盈案矣而鎮守將弁不聞定一策籌一計擒一賊獲一艘如此虛糜廩餉袖手旁觀一任商民人財兩失飲泣吞聲何以捍衛海疆克稱職守聖明在上無微不徹湖南近事覆轍可鑒共事各官寧

不寒心 功令赫赫身家爲重與其貽悔于事後何如
奮力于事前况北風將作機不可失倘縱令兔脫則養
癰遺患咎將誰歸沿海將弁豈無智謀忠勇之士大敵
尚思奏功小醜遂致坐紬豈非可耻良由積習偷安空
文塞責本部院稔聞已久封疆所係豈甘姑容緘默同
人受過若非大聲疾呼恐成膜外相視合行嚴飭爲此

諭將照牌事理迅卽殫心竭力奮勇擒拿毋分此
疆彼界以致窺跡潛踪如剿捕有方根株得絕本部院
卽會章薦揚倘仍前玩泄定將縱寇殃民情由飛章會

叅請 旨拿問决不稍爲寬假也

飭守口將弁協捕盜賊

爲嚴飭守口將弁協力搜捕盜賊以靖海疆事照得沿海地方建立營汛製備巡船原爲詰奸固圉保衛商民而設該汛將弁自當加意巡防遇有奸宄竊發無分疆界立刻協力窮追庶寇盜斂跡而商民藉以無患乃今半月之內連劫多舟明係巡防弁兵偷安畏縮以致鼠賊毫無忌憚連檣放炮劫貨掠人似此養癰留患不但俸餉虛糜抑且封疆貽悞也軍紀安在官守謂何本應會叅姑先嚴飭爲此牌仰該將照牌事理即便會同隣

汛彼此聯絡毋分疆界督率兵目設法剿捕竭力搜拿
務盡根株如敢懈怠偷安虛應故事致使滋蔓貽患海
疆本部院定卽飛章會叅按以軍法從事決不寬饒

飭水師兵缺混補陸汛

爲飭知事照得設兵分汛水陸殊名差操不同技用各
別是則陸汛兵缺應選騎射熟嫻之兵接頂水師名缺
當擇諳練水性之人拔補方收實效不致虛糜糧餉况
今歲海洋多警尤當加意選拔練習哨捕今查該標營
詳報水戰守兵名缺混將陸汛兵丁充補其人之諳練
熟習與否竝不聲明除經批飭外合再行知爲此牌仰
該將照牌事理嗣後水師兵缺務將熟諳水性船務之
兵聲明詳報分別收除不得仍前混請互換致滋虛糜

有干察究未便

飭巡防

爲嚴飭加謹巡防以靖地方事照得杭城五方雜處最易藏奸是以先經飭令在城府協廳縣嚴督兵捕加謹巡查在案所有嘉湖等處水陸通衢鄉村市鎮地方官弁更宜嚴加巡守使無良之輩不致乘間竊發貽害商民合再通行嚴飭爲此牌仰該司官吏照牌事理卽便移行各協府轉飭該地方官弁凡遇水陸要道多撥官兵加謹巡防至于鄉村市鎮力行保甲稽察奸宄務使宵小潛踪地方寧謐如敢偷安疎懈虛應故事以致地

方失事者有司汎弁定以溺職指叅斷不寬假凜之毋
忽

禁關蠹盤踞

爲嚴禁關蠹盤踞白役朋克以肅法紀以除商害事照
得該關書吏各役俱有額設定制縱蠹病商卽干嚴例
額外私設亦有處分煌煌 功令孰敢不遵近聞該關
竟有不遵經制濫用白役更有役滿犯革之徒仍然夤
緣盤踞合夥朋克者損課累商莫此爲甚若不剔除何
以澄清吏治爲此照會該監督查照來文事理卽將該
關書吏以及巡攔各役逐一清查務遵經制不得容留
積蠹濫用白役仍造具花名清冊送查毋得陽奉陰違

察出致干嚴究未便

申飭計典陋習

爲申飭計典積弊以肅吏治事照得浙省今歲補行大典本部院與督部院同心共濟矢志澄清不敢稍有苟且非特可質鬼神屬員亦當共諒反覆告誡不啻嚴且切矣惟是本部院撫浙年餘所屬大小官員自司道府廳以及牧令教職其品行之賢否治事之勤惰皆歷歷在目了然于胸佐貳雜職員數雖多平日亦有採訪統候屆期舉劾外然而事關大典理事詳慎知府表率一郡灼見必周是以向例調集會城公同考核以期至當

稔知陋習相沿往往借赴省之名誅求下屬或妄稱薦
舉或藉口請寬致有冒昧之徒苞苴營求以圖僥倖甚
至事畢還郡則曰爾卓異係我贊揚爾輕効係我求減
而不議不論之員則曰已入八法係我再四跪懇而免
是黜陟之權爲若輩壟斷之具蓋已久矣本部院下車
以來冰蘖是矢董率備至業已舌爲之敝凡爾郡邑諒
應恪遵法紀共保功名然而賢者固知自愛不肖豈盡
無人合亟申飭爲此牌仰該司官吏查照來文事理卽
便轉飭各府將屬員貪廉實跡老病情節從公開報一
遇調省文到立卽束裝起程屏絕私謁倘以赴省爲由
借端需索向所屬官員或甘言作餌或挾術要求因循
錮弊以身試法一有訪聞定卽執法糾叅斷不少假如
屬員中有不自安分乘知府赴省時行賄鑽營托名餽
贐者發覺之日與受罪均後悔何及勿謂計典一過而
督撫之白簡便束之高閣也無負婆心各保身命慎之
慎之

飭知府勒索兵餉

爲兵餉之錮弊雖除府官之勒索不改再行嚴飭以肅
功令事照得地丁錢糧撥派營餉先行解府之時叢弊
多端如彈兌折耗胥役指勒以及扣除陋規不一而足
致屬員非轉派于民卽虧欠庫項前院批飭應聽各邑
自行支放所以杜弊除累也本部院撫浙以來凡有利
官民之事皆守而勿失且清白自矢一塵不染每事認
真始終無二暗室屋漏儼對 天威此心可以仰告鬼
神者原期大法小廉上行下效茲屬員之中自司道以

迄守令觀感自勵者固不乏人乃聞有不肖知府敢將
兵餉舊例仍行需索錮弊如城牢不可破夫知府表率
一郡屬吏之敗檢者徇情不報尙爲溺職乃貪婪自恣
全無忌憚非特無能彈壓下寮是反播惡于衆也一項
旣可陽奉陰違則因事取求種種剝削何所不至厲民
蠹 國莫知府爲甚言之真堪髮豎試思一被糾叅提
問究擬身罹刑辟有何面目清夜捫心可羞可辱除現
在密訪叅究外然不戒視成亦所不忍合再嚴飭爲此
牌仰司府官吏照牌事理各各洗滌肺腸革心革面一
切陋例痛加湔除果能力改前非本部院姑置不問倘
怙終不悛因循苟且白簡隨之悔無及矣各宜凜遵勿
謂言之不預也

飭拏訟師土豪

爲嚴飭查拏訟師土豪以安民生事照得浙省民多健訟凡雀角細事無不投託訟師訟師包攬到手視爲奇貨先問原被家計輒駕大題希圖聳准遂指官誑騙無所不爲若兩造不願終訟而訟師反刁難不息挾之以不得訟之勢彼得于中取利不飽不休富則蕩產傾家貧則拖累斃命更有一班土豪交結衙役出入衙門說事過付公然無忌甚至廣放私債利上加利盤剝小民準折房產子女少不遂慾卽令狼僕弔回私刑毒打小

民畏勢隱忍卽或告理有司徇情不准刁風日長爲害
滋甚合行嚴飭查拏爲此牌仰該司官吏文到卽卽通
行各屬大書告示遍加曉諭如有前項訟師土豪責成
地方官不時查拿解轅以憑盡法究處毋得瞻徇容隱
干咎未便

飭立三催限期

爲特申三催之法以振積玩以清塵牘事照得本部院
衙門日行欽部事件以及批發詞狀非關兵餉錢糧卽
係重大刑獄均有定限毋容遲悞所屬各官自當實力
奉行依限詳結在官則無叢脞之譏在民亦省拖累之
苦今本部院蒞任以來檢查案牘如欽部事件壅積纍
纍發審詞訟概置塵封更有命盜重情經年累月延推
不結報病報故殆無虛日兼且無罪小民牽入詞內農
桑荒廢妻子饑寒誰司民牧心獨何忍上下玩愒殊負

職守若不立法振作大聲疾呼其何以仰副 聖明委
任至意合行立限通飭爲此牌仰該司官吏查照來文
及單開事理卽便轉飭所屬嗣後奉行一切欽部及命
盜逃人錢糧雜項并詞狀等件遵照風火雷三催之法
應審解者妥擬詳解。應查覆者明白查覆。應完解者照
數完解。如三催之後尚不依期完結除發飛籤提經承
究處外定將承審承查之官以易結不結指叅至所發
飛籤不許郵筒投繳。卽公事已完亦必責令經承賚銷。
敢有沉攔差鎖拿倍處慎勿玩違自取叅咎

飭換票照

爲嚴飭事爲照海盜劫掠今歲爲甚地方官弁聽其飄
突束手無策甘心叅處不知海盜非從天而下未有不
由內地者始而縣官混行給照繼而汛弁盤驗不嚴以
及沿海保甲虛應故事竝不實心稽察致此輩得照公
然出洋公然回口噐械口糧陸續有濟是往來出入聽
其自由此輩又何憚而不爲盜爲今之計欲淨其根株
必先清其源本是以督部院暨本部院諄諄以嚴于換
給牌照爲訓自本年十一月爲始務驗的人的名取有

地隣保結將年貌註明照內不得移甲換乙至出口之時務須查驗人照數目年貌相符方令出洋則來年盜不加多剿滅亦易至于沿海保甲客店不能實力盤查致令盜夥潛歸或製器械或販口糧往來接濟倘實心稽察歹人必擒此閩省之盤獲林老大其明驗也若謂賊盜俱在粵閩與浙省無涉則請問沿海文武各官其能保浙屬地方不伏一奸不藏一線耶卽令海不揚波而慎牌照而嚴保甲亦屬安不忘危職分當然不容忽視况際此多事之時漫不經心將來一有發覺功令森

嚴白簡具在豈不自貽伊戚後悔莫及合行通飭爲此牌仰該司道營弁照牌事理嗣後商漁船隻有司給照換照必取地隣保結務要的人的名并年貌填明照內守口弁目必須查驗人數目年貌相符始放出口則明歲盜無增益至于口岸客店保甲亦必稽查有法則冬歸者可獲春出者可擒內地奸民接濟者亦必敗露而賫盜糧者絕矣其各認真力行勿視紙上常談置之高閣若再玩忽從事定當照例嚴叅決不少有寬假亦不得藉端滋擾并于察究仍具遵依報查毋違

飭各屬冒銷供應

爲嚴飭事恭照 聖駕南巡備辦夫船等項原據該司
等會議通詳仍于闔省俸工內酌捐抵補在案今已

回鑾事竣所有備辦各項均應據實造報以白臣子寸
衷恐經手官員居心不肖聽信蠹役謂公項可以因事
侵漁應付不妨憑空捏冒上下通同朦朧率混以通省
官役之脂膏飽數員貪詐之谿壑法紀何存且本部院
與督部院辦差兩次事事留心寧無一隙之明甘如木
偶但不早爲教誡未免錮弊難除合行嚴飭爲此牌仰

該司官吏卽將各官備辦一切供應事宜嚴飭查明應變價者着落變抵應銷算者據實開銷該司務須躬親稽核必嚴必確毋濫毋虛逐一造冊呈送本部院核奪如有捏欸支飾浮溢價值隱匿抵換物件等弊該司飛提經承人役究解重處仍將本官指叅倘該署司聽其欺隱朦混率轉定拿司胥重責枷示以作榜樣該署司亦大有未便慎之慎之

飭行料理 南巡事宜

爲公務事恭照 聖駕南巡溯查從前成案一切應需各項俱係預期捐備在案今閱邸抄楚豫等省恭請

翠華臨幸雖未奉有 俞旨而浙省 鑾輿時邁被澤

尤深自宜預爲經理庶不失臣子恪共之義第

聖主愛民甚切屢奉 嚴綸申飭不許借端那帑派累

小民而地方官應爲備辦之項豈容膜視致干咎戾除

橋梁道路城郭已令有司及時修舉外其餘一切事宜

該司務須凜遵在例料理停妥庶免臨時缺悞合亟飭

行爲此牌仰該司官吏文到卽將上屆 南巡卷案逐一查明應修整者速飭修整應置備者立卽捐備務必悉心料理慎勿怠忽從事自蹈嚴譴仍申飭所屬不得借端那帑派擾累民如有故違卽行叅究慎之慎之

飭革平湖縣忤作

爲活殺弟命事照得人命關係重大務必相驗明確庶罪犯可無枉縱茲查平湖縣審報施榮毆死陳彥芳一案忤作朱貴相驗屍傷左肋一拳圍圓三寸竟不註明致命字樣而左耳根一傷則稱跌蹠骨損致命夫左肋乃致命之處旣受拳傷何得含糊不行喝報而跌仆于地豈能遽至骨損該縣自應相度其地體察聲明乃任其朦朧殊屬踈忽且左肋一拳施榮直供不諱以致跌仆是拳傷在先而跌傷在後情形如繪今朱貴覆呈惟

云嗑傷致命不特飾其賄囑之弊亦明示操縱出入得
以肆其欺詐不法已甚本部院親加鞫訊已將朱貴責
懲外但忤作驗傷所關甚重難容匪類濫克致貽後悞
亟應革退另募合就飭行爲此牌仰該司官吏照牌事
理卽便轉飭嘉興府平湖縣將忤作朱貴卽行革逐速
募誠實之人克當該縣驗報不加詳慎記過一次取其
遵依報查毋得違混干咎

飭拏撞棍

爲嚴拏撞歲棍徒以肅法紀事照得三年大計乃澄叙
官方之鉅典激揚勸懲所關甚重本部院躬膺

簡命巡撫是邦正值察吏之期自當嚴于甄別矢慎矢
公以仰報 聖主委任至意雖下車甫及半載而屬員
之才能廉幹老病昏庸皆已了然于胸中無俟採訪而
知且本部院于平常庶務無論鉅細悉屬親裁豈計吏
重任反肯寄耳目于人耶但人心叵測狡詐易生或有
走空神棍在于各府屬指稱本部院差訪名色招搖撞

歲而府縣等官或患得念重或自揣平素多愆私心惴惴墮其術中亦未可定合飭嚴拏爲此牌仰該司官吏照牌事理即便轉飭各府屬如有棍徒藉今歲大計之名指稱上司差訪在于所屬地方招搖撞騙者該府縣等官卽行嚴拏詳解以憑按法重處倘府縣等官不肖自萌私相囑託不行拏解一經訪聞或別有發覺審出曾在某府縣招搖誑騙情事卽將容隱和同之官先行題叅究擬決不輕饒毋得故違自貽伊戚

飭歲暮巡拿棍徒

爲嚴行巡緝以靖地方事照得杭城爲省會重地市肆稠密每遇歲暮貿易擁擠之時有等不法棍徒假冒旗廝成羣結黨在于街市剪絡掏摸或闖入店舖掉包誑賺更有捏使低銀短價強買不遂其慾輒肆撒潑行兇恃強搶奪合行查拿爲此牌仰該府照牌事理即便督率巡捕員役并保甲人等汛防弁兵在于省城內外嚴加巡查如有前

項棍徒在于街市剪絡掉包及強搶強買生事行兇爭鬪者如係民人卽鎖押仁錢二縣如係旗下兵丁卽鎖

押理事同知會同駐防章京公審盡法究擬通詳毋得
徇縱取咎未便

催 南巡供應冊

爲公務事恭照 聖駕南巡一切費用俱出公捐絕不
擾累民間所有用過銀兩及存留什物久經檄催確核
估變造冊報奪在案延今兩月尚未造送揆厥所由蓋
緣前此冒銷故智牢不可破觀望遲延期于沾潤獨不
思通省清苦之俸工供數員貪冒之谿壑巡撫坐鎮于
上豈非木偶本部院下車伊始曾經嚴諭各官謂督撫
俱係新任屬員賢否尚未周知卽此一節以辦事視各
官之才能以銷筭視各官之操守不啻三令五申矣乃

據該司口稟費用之數日以增估變之數日以減深爲駭異蓋一日無定總則一日無底止該司身任方伯總理錢穀豈容該府縣任意率混苟且支吾成何法紀各官意謂款非正賦未便入告不知南巡供應出自公早已直徹宸聰假公濟私白簡安用爲此牌仰該司迅飭各官速將動辦銀兩細冊及估變什物確數星速詳送以憑核奪倘仍藐視不遵該司卽鎖拏該管經承解赴轅門以憑重責枷示至混行報銷以及任催不理之員亦卽分別揭報聽候叅處勿得徇延

飭屬吏恭懸諭旨

爲欽奉 上諭事案准吏部咨文嗣後薦舉卓異官員欽奉 諭旨所列事蹟務期無加派無濫刑無盜案無錢糧拖欠無虧空倉庫銀兩境內民生得所地方日有起色其他所開虛文俱不必入等因當經備錄全咨案行該司通飭欽遵在案伏讀 天語煌煌光昭日月七旬之內吏治民生包括無遺大小臣工自宜仰遵

聖訓永矢勿渝以期不負厥職當製造匾額恭懸大堂俾朝夕省覽庶可觸目驚心合行通飭爲此牌仰該司

官吏將欽奉 諭旨逐句恭繹一一力行慎勿因循故
習自甘暴棄又卽製造匾額自無加派起至有起色止
精刻七語上刻 諭旨二字仍將懸匾日期報查毋得
遲違如敢借懸匾名色派累分毫者決不姑寬

估修三郎廟一帶塘工

爲江塘屢見坍塌等事照得本部院于七月二十六日
閱視江塘查望江門起至三郎廟等處一帶江塘俱關
緊要而三郎廟爲尤急蓋江濤借此殺勢而山水亦借
此砥柱今閱舊工不堅倘有疎虞已成堤岸盡屬難保
合行確估修築爲此牌仰該司官吏照牌事理卽速轉
飭督工甘同知迅將三郎廟一工火速逐一確估造具
工料細冊詳送以憑察奪毋得刻遲

